

清光緒朝中日交涉史料

卷廿九之卷卅
廿年至廿一年



清光緒朝中日交涉史料卷廿九

(二二八六)直隸總督李鴻章彙報前敵緊要軍情摺 光緒二十年十二月十八日

革職留任大學士直隸總督一等伯臣李鴻章跪奏爲彙報前敵緊要軍情恭摺仰祈聖鑒事竊自倭人構衅徵調繁興所有籌辦事宜及逐日軍報疊經臣先後具陳及隨時密電總理各國事務衙門轉奏並奏明前敵偵探布置接仗各情形關繫緊要隨時電達以期迅速仍將各電分日摘錄或一句或半月彙齊奏報一次以備稽查十一月二十七日以前業經開單奏報在案茲將十一月二十八日起至十二月十八日止照錄各電彙繕清單恭呈御覽理合恭摺具奏伏乞皇上聖鑒謹奏光緒二十年十二月二十二日奉硃批知道了單留覽欽此

(二二八六)附件一 前敵緊要軍情各電

謹將前敵軍情緊要各電自十一月二十八日起至十二月十八日止擇鈔恭呈御覽保定藩司電河南豫靖營李葆珠帶兩營今日到省據云伊統領李永芳已統四營於十九日過省現紮南海子此兩營明日啓行云十一月二十八日已刻

袁世凱電頃接廿三日自遼陽探稱寇馬近安山站距遼六十里長蔣兩軍往沙嶺安山一帶截堵聶呂仍在遼南云 二十八日申刻

周馥電聶廿一日來信嶺無事遼局仍趕送糧彈聞海城賊東退守山廿三日之戰倭死傷殆千數章高元守蓋東張光前守蓋城亦無事云 二十八日戌刻

袁世凱電頃得西路探報廿六日長帥仍在安山站聶呂仍在遼南兩處均無戰事再聞海城北耿台子童鰲堡一帶奸民土匪甚多遇官兵弁輒殺焚接待倭人甚恭前遣探弁內有八人久無消息未知是否被害云 三十日未刻

袁世凱電李光久聞日間可抵石山站昨專弁廿七自摩嶺來稱糧彈尙足糧尤多自十八後未接仗倭大隊仍在雪裏站依帥十四五日親督苦戰將士傷亡甚多倭亦傷亡不少聶呂奉裕帥電函仍在嶺守云 十二月初二日戌刻

袁世凱電頃接摩嶺遼陽三十來電依帥帶十營廿九來遼與長帥會剿海股東留十營聶呂仍守嶺寇時在通遠堡出沒遼運局仍照常接濟云 初四日辰刻

前飭劉含芳派人赴旅順密探頃接支電稱迭派隊長王國瑞天津人親兵叢毅都旅順人扮作鄉民赴旅昨晚回稱前月廿三由雙島上岸行至白玉山後被倭留在局挑水掃地廿

四到船鵠總局做活廿五見操場操兵約倭兵二千餘以兩草人作靶一寫李中堂姓名一寫宋宮保姓名用槍礮打廿六赴西澳合砂溝魚雷營做活廿七八九等日皆在魚雷營所見東西兩局各庫鐵木料物及能拆機器收存鐵道擄掠一空埋藏雷件器械亦皆挖出裝回該國倭兵各持地鑽凡鬆土之地無不挖深五六尺東澳導海遇順超海各船皆已拖往該國鵠廠有百餘人趕做鐵板各村牛畜豬雞草料先皆搜迄責令按期送交略給以錢居民多有逃避旅順街道所殺民人實有二千六七百皆以大坑收埋各山兵民被殺尤多皆未掩埋廿九傍晚自合砂溝逃至雙島上船初三午後兩點鐘進口等語云 初四日辰刻

章高元等蓋平來電廿七日南路賊至熊岳折向東去廿九日東路賊至石門嶺賊探十餘騎到牽馬嶺前被卑軍放哨馬小隊用槍擊退初一石門嶺賊亦退回頃據探報向析木城去云 初五日辰刻

倫敦電美國前任外部大臣福士達中國請其襄理中日和約事宜日廷業已允許云 初六日巳刻

袁世凱轉據摩天嶺呂本元等來電依帥帶多營援遼賊在通遠堡上下挖洞匿其中大股在雪裏站長嶺子各山頭架有銅礮八盤嶺蘭花嶺亦見賊蹤別無隊伍撥往堵禦如由此

竄擾實於嶺防大有關係賊情變詐尤須加意嚴防云

初六日亥刻

聶士成朔電頃據民探回稱現雪裏站鳳凰城沙河一帶賊衆約一萬數千人近日鳳城由朝鮮運來草包大米極多雪裏站人運至不少倭於鳳城左近多焚柴草薰地化凍鑿溝藏兵似欲堅守擬於初二早親率馬隊前探虛實飭夏青雲馬隊即行前紮盛軍亦酌派馬隊一營前駐以備策應並會同呂本元孫顯寅耿鳳鳴嚴勵將士照常加意防堵以備敵詐云

初七日辰刻

倫敦電日本新聞紙言西歷十二月十九日中日在遼陽耿家寨大戰中兵死傷三百名日兵亦死傷四百七十二人又美國前任外部大臣福士達已前赴東京云

初七日申刻

滬局沈能虎電昨晚英律師擔文與英水師斐提督密談知英廷不准倭至吳淞外核與英外部復龔使不得有事於引進之路此路即上海與揚子江平常往來之路相符又邇日英廷電詢就現有師船力能抵禦否答以能恃復奉英主命設倭擾及長江即應轟擊云又談悉俄備精兵九萬於伯力海參崴一帶並添派頭等鐵甲船五艘於東路明與英親近實爲倭約侵華並欲與英作難故英主已命斐提督察探豫備云

初八日辰刻

劉含芳電第四次所派史得勝僱船往探金州消息據稱詢之金州來往居民口稱城內有

倭兵兩千餘人韓民車夫千餘人現將車夫剪髮改爲倭兵勒令金州城鄉出大車千輛口稱裝糧北運許給車價民間允辦三百輛城內飢民倭用粗米散粥居民房屋各家讓住一半空手男民准其出城眷口不准挪移離城一二十里鄉村到處淫擄初三到旅順雙島卡緊不能前進初四至旅順迤東殷家口泊船初五由東山進旅順到東岸船塢各處見有工匠又至元寶坊操場見有四五百倭兵操練各山或二十或三十操習爬山並見北來傷亡倭兵百餘初六開船回烟等語昨新南陞船來自長島聞倭人自言海蓋之戰不畏傷亡但怕天冷有一日倭兵敗後乍時烘火墮指裂膚者甚多云

初九日己刻

倫敦電朝鮮東學黨輒生變亂焚燒屋宇甚多佔踞鄉村亦復不少聞朝鮮向日本貸款五百萬元又英俄兩國彼此優待據俄京傳說此事甚有裨益若將來中日議和辦理更覺順手云

初九日申刻

漠河礦局袁大化初四電俄有國喪嗣君初立勢難助倭對江前擬挑兵赴歲茲已中止頃接俄督來函極思聯絡云

初十日辰刻

倫敦電比得堡來報俄國肯將帕米爾之解拉爾及高落甫二道讓歸英國將來中俄兩國可以息爭矣又日本王特贈德王威靈菊花寶星以酬德弁能代日本訓練士卒之勞云

初十日酉刻

袁世凱蒸電前遣弁扮民赴海城內外偵探頃接初八來稟寇新由旅順添來二千餘名到海舊有兵千餘向東北山去大隊駐城西南八里之唐王山置礮甚多倭酋大山岩在焉聞倭酋山縣有朋數日亦來海策應城北上里橋民房圍牆及西北教場山城東雙山玉皇山均置礮設防云初十日戌刻

昨據成山電局報倭船數隻來往游弋不絕已嚴飭防水陸將領預備夾擊十二日己刻呂本元孫顯寅初五來電初二日會聶士成帶馬隊至通遠堡賊在長嶺子各山溝經探馬及鄉民來報賊分股竄擾西南恐抄後路立赴萬兩河大磨嶺山羊峪雞爪山各處察勘賊探馬時來此處見我有備大隊退紮四顆楊樹乃相度地勢扼要紮隊大磨嶺最關緊要留駐數十騎派馬步左營紮中萬兩河分探櫻桃園車頭嶺派馬隊後營紮雞爪山分探岫巖海城各路四散分防百餘里零星散紮殊難聲息相應嶺上各營防禦北路萬難撥調賴馬隊易於往來策應並分十餘撥探防云十二日午刻

章高元張光前蓋平電初四日石門嶺到賊數百初七賊西趨遇卑軍馬小隊數十名扼牽馬嶺迎擊斃賊數名又元部四人在湯池遇賊探邀同民人隨擊又斃賊三名初八石門嶺

賊卽退去熊岳初五到賊二百餘十一又添賊二千餘行礮十數尊聲稱攻蓋刻已預備迎

勦云十三日辰刻

劉含芳文電頃旅順逃來田家屯民人田光均等一百零六口據稱倭兵現存千餘人近來無物不擄挨戶騷擾現無分老少民人皆紛紛南徙等語芳於芝罘島留養已千餘口灤家口留養旗人九十八口其濱海各島糧盡而來者亦復不少芳當竭力籌維給糧度命今日英提督率兵船八艘先後到烟聞明日尙有兩巨艦到目下撫帥派駐榮成海隘濟右泰靖精健三營文登駐親兵合定左右三營甯海東字三營自酒館至烟臺沿海分布十營惟望援孔殷云鴻聞英人密探倭有猛撲威海之說英水師提督統兵船來烟似有用意已飭威防水陸統將嚴密合力防備十三日已刻

山東甯海州電十一日四點鐘甯屬大金山東北約二十餘里有倭船二艘停輪測水由中營出隊登山鳴礮始鼓輪去云十三日已刻

倫敦電風聞日本不肯停戰其海軍已赴山東各口偵探有可以上岸之路卽將陸兵渡上云十四日未刻

倫敦電英國泰謨斯新聞紙刊有報章云日本攻取旅順時戕戮百姓四日非理殺伐甚爲

慘傷又有中兵數羣被其執縛先用洋槍擊斃然後用刀肢解據云日兵亦有數人被中兵所殺惟日本士卒行徑殘暴若此督兵之員不能臨時禁止恐爲終身之玷云十五日申刻章高元張光前十四日電南東兩路倭賊各數千人均分四隊前進職等扼要嚴堵歷二日一夜十三南路頭隊賊約七八百人近逼蓋南五里用礮遠擊賊大受創退居沙埂台光前奮勇數十名在鳳凰山伏擊斃賊傷賊各十數名元部奮勇數十名在牽馬嶺見東路賊頭隊數百人西趨伏擊斃賊十餘人傷賊三十餘人斃賊內有三道金箍者一人十四南路賊復進距蓋八里東路賊已抵牽馬嶺下明後日必有一場血戰十四酉刻徐邦道所部三營已抵海山寨其餘隊伍約十五可至云十六日辰刻

袁世凱電營口善道電稱倭大隊撲蓋平章軍力戰自晨至午未稍卻殄倭千數分統楊壽山中礮陣亡蓋遂陷又據遼陽十二探稱本日申刻依帥所部敵愾軍在湯崗子遇倭夷數百人互相開仗敵愾軍搶占山頭長帥所部丁明兩統項當即開隊夾擊斃倭逆數十名賊馬四十餘匹倭夷敗歸海城各軍跟蹤進勦長帥今晚已親赴前敵云十六日戌刻

德瑾琳報總稅司電稱現接要電東洋第三軍已於華十二月十四日在廣島開行大約赴威海衛上岸英水師提督因此來烟臺查看情形云已飭各營加嚴防備十六日戌刻

章高元電十四夜賊由南路進攻職督隊扼剿戰至天明見賊隊添至五六千人三進三擊退擒賊十餘人戰至已刻東路賊四五百人由槐樹溝突出并分數路進犯楊壽由李仁黨兩統帶督隊力戰賊獨撲數次均被擊退賊用行礮數十尊排列轟擊楊李兩統帶及管帶蘇緒謨幫帶費君廉李世鴻同時陣亡地闊兵單寡不敵衆援應未及以致潰退查東南兩路賊共萬餘人此次血戰擊賊傷亡約在三千人我軍傷亡七八百名幫帶哨官哨長傷亡甚多查明再報總因職鎮督率無方慚愧無地請從嚴治罪現奉宋帥諭駐營口東二十五里江家房一帶云十八日己刻

成山頭電兩桅雙烟筒兵輪係由南來現在西南約距成山六里拋錨云十八日午刻滬局密電西探自廣島函稱近日倭主於軍事專與武員密圖文員一概退職惟首相伊藤一人亦須事後與聞羣相惶惑廣島口埋雷悉起各船出入如常並謂如此秘密西探亦難得消息云十八日午刻

(二二八七)吏部呈遞候補主事洪嘉興條陳軍務呈文摺

光緒二十年十二月二十二日

大學士管理吏部事務臣張之萬等跪奏爲據情代奏仰祈聖鑒事竊據臣部候補主事洪

嘉與呈稱縱敵非計越職陳事呈請代奏前來臣等公同閱看論兵籌餉各條尙無違礙字樣不敢壅於上聞謹將原呈恭呈御覽伏乞皇上聖鑒謹奏光緒二十年十二月二十二日大學士管理吏部事務臣張之萬協辦大學士吏部尙書臣宗室麟書協辦大學士吏部尙書臣徐桐降二級留任降一級留任吏部左侍郎臣崇光吏部左侍郎臣徐用儀吏部右侍郎臣長萃吏部右侍郎臣廖壽恆

(二二八七) 附件一 洪嘉與條陳軍務呈文

具呈吏部主事洪嘉與爲縱敵非計越職陳事懇代奏請聖鑒事

一詳審局勢慎求辦法七月軍事法當以一軍趨平壤一軍疾踞咸鏡道一軍循金化狼川拊漢城之背則牙山之兵扼其前海軍角其罅江原慶尙之間必結寨與咸鏡相應不交鋒而倭逆已情見勢屈矣倭逆未渡江已前法當重扼圖們鴨綠之間進踞咸鏡道與彼爭建瓴之勢咸鏡易守難攻與江原慶尙二道山勢綿亘處處貫通並與我琿順軍犄角此最形便九連城一帶擇險扼要或以雷守堅壁清野擊其半渡仍宿重兵於摩天嶺岫巖遼陽三方策應有警互援計不出此而使宋聶兩軍疲於奔逐孤立無助孱兵儒將連營數十不遺

一矢此深可追咎也今奉天已岌岌矣理宜悼心失圖勤追前缺法宜簡劉坤一起吉林經畫朝鮮內復鳳凰城有吉林斯有奉天無奉天必無吉林吉林重則朝鮮緊奉天自鬆再簡李鴻章駐廣甯經畫奉天廣甯重則錦州以西屹然無虞以全力注旅順收復易如反掌魏光燾駐山海關直隸添設巡撫慎簡一忠純知兵之人任之或卽以魏光燾爲之責其接濟諸軍慎固封守不可貽誤良將如董福祥袁祖禮輩速遣出關分頭恢復或取旅順或規朝鮮任其自擇謀定後戰更遣朝鮮孤臣潛引朝鮮忠義之士收召遺民別樹一幟飭熱河都統安撫窮黎清除內匪一轉移間全局立振兵法所謂奇正相生如循環之無端所謂先其所愛微與之期也項羽百勝卒挫烏江漢高屢敗終於大定得算多也布局遠也夫倍道兼行百里而爭利則擒三將軍勁者先疲者後其法十一而至五十里而爭利則蹶上將軍其法半至况倭逆越國爲寇師久暴露國民內怨祇以未經痛懲遂如羣犬之噬臍一旦兵連不解深入受困首尾不救朝鮮反背積怒旣深仇殺更甚守兵遁潰輕重盡矣越國旣遠兵士膽寒陸兵奮擊於內海軍要截於外可以得志如阱中獸終膏斧鑕時哉不可失也然吳起曰用兵之害猶豫爲大三軍之災生於狐疑竊見平壤始敗人心已移鳳凰繼失官場大震逃徒紛紜敵人拊掌和遷之議盈耳隨警信以俱來二三之見旣參何調度之能斷昔宋

室南狩之輿已駕勝國也先之禍已逼能守者猶有李綱于謙髮逆淪陷十餘省夷氛亦極惡回捻交訌新疆甌脫會國藩支持危局卒底救平繼以左宗棠收復伊犁西人且恐我西向爭霸彼時何時何船何礮何利械之可言何洋務之遠勝於今何昔能定內難禦外侮而茲竟無以敵倭逆也則狐疑之害也竊誠恥之痛之欲戰勝倭賊先戰勝此心之需欲用馮河之勇先致好謀之識去猶豫決狐疑不遐遺此今日根本至計也

一請推心置腹君禮臣忠則辦法可籌強寇可滅伏查昔法王拿破崙強暴百倍倭逆滅國數十思大舉挫俄有衆六十四萬巨礮一千二百門卒爲俄誘致重地敗蹙墨斯科府法國精銳一挫殆盡遂失其國况倭逆精銳究竟不多貧困尤甚乎書生輕敵固多僨事老臣縱敵其過與書生等雖然書生激於義憤老臣顧忌太多暫圖卸責均未敢以爲是也此實在我皇上推誠布公精求極是之辦法而已夫劉坤一李鴻章張之洞李秉衡等朝廷此時倚之猶腹心股肱該大臣等應如何忠藎爲懷盡心盡分卽有目前積重之弊貽誤全局者猶宜爲國家披瀝肝膽極力轉移豈容安於不爲自取重咎貽譏千古刻下倭逆恃其攻城野戰之力逞推堅挫銳之威戰鬪愈勝而國力愈疲威武愈揚而智力愈窮若遽徇其要脅講和適墮其計古來英雄用兵立大功於天下必用諸不得已者今倭逆肇釁窮兵在所得

已我之士心激於義憤將迫於不得已該大臣等必有辦法奈何錯此機會不爲國家長慮
卻顧一奮精神定一二百年之局勢伏求我皇上推誠布公將此批情形密諭知劉坤一李
鴻章張之洞李秉衡等圖艱思永務策萬全該大臣等知朝廷本明見萬里而又使之有禮
當愈加感勉思奮奉廟算以進止矣

一擇將以忠勇知兵爲中選而今日言知兵尤必熟今日戰守情形槍礮何以取準水陸何
以布雷營壘何以合宜地利何以形便陣法何以變化又必如孫武用兵奇正相生如循環
之無端是尤難其選也查副將銜候補遊擊袁祖禮忠勇性成精於製造測量礮準各法於
西人營壘避礮之法地利陣法變通之宜無不究心足備忠勇知兵之選又考自南北花旗
爭戰以後水雷之用大著布國希理哈撰海防新論引數事以證地雷之可用曰剝德拉帶
兵攻大令堡北軍已占得高岸及河中之洲南軍因死傷者多力不能敵預於地中埋伏水
雷北軍踐發轟裂驚走而退又曰南方將軍比給德善用地雷北軍畏之遂疑其各處皆藏
地雷一日與北軍交戰所帶之兵甚少而有數處緊要之所恐敵人必先來攻無法保護則
於此處稍掘其土僞爲藏伏地雷者於其四面插旗誌之北軍多而且強竟無一人敢從此
入因此守住要口倭逆陸軍攻守亦恃旱雷今年五六月間我武備堂學生繪倭兵駐漢紫

營地勢略圖寄稟李鴻章有倭逆所恃者旱雷得意之語是地雷爲今日戰守之要著也然必製造無誤埋伏有方地勢能得故曰待其人而後行用非其人未必效也袁祖禮於造用地雷神而明之尤其餘事以造雷之人用雷其妙處亦可想見山海關外水陸各路及今佈置來春冰解收效匪淺似不宜自羈手足使不得衛其頭目倭逆重兵據我海城其意叵測廣甯一城最爲扼要遣將駐守亦不宜稍涉疏緩昔年甘肅新疆用兵劈山礮最爲利器宜如法多造講明其用選將擇地利械其事一也

一無政事則財用不足聖王生財之道原與政事相通民俗相權故俗不敝而財不可勝用昔周公作酒誥羣飲之罪至死不赦孟子曰禹惡旨酒而好善言同治十二年間德國增徵酒稅以嚴酒禁又西洋各國煙酒之稅嚮皆極重數逾幾倍故煙酒價極昂市肆沽酒與醉人尤嚴例禁尙有我中國聖人惡旨酒作酒誥遺意又德相畢士麻克定立制度凡民生日用所需之物皆重稅他國進口貨而免本國出口之稅所以驅民務本講求種植製造而革儉惰苟且之風也擬請旨飭下實心救時之各督撫大臣凡中國煙酒及外國運來之煙酒應如何分別名色重立稅則除民間所造無灰米酒不能經久行遠爲祭享醫藥所需者一概免稅外其餘一切煙酒之類皆爲有害於人虛糜民食並奪稼穡桑蠶之利一概重則嚴

科實於斯民性情風俗食用地力帑款獄訟盜賊在在有益無弊且禁釀一事我中國講荒政者向亦行之有效誠使重稅煙酒出其有餘以興一切教養善政更確查近年不肖卡員細碎煩苛徵及所不應徵密布子卡擾民市怨之弊概與廓清明白曉諭俾國家歲增千百萬帑款世間少幾醉人窮黎蘇幾分生意未有不樂從者孟子謂文王制其田里教之樹畜食之以時用之以禮此雖加稅實具有精意耳豈獨讓海外諸國各擅富強之術吸吾民脂膏視吾民日沈溺於無賴至洋藥一項所訂條約本許加稅爲我國自主之權利通商大臣辦理自有權衡若夫欲杜洋藥之來苟得其人不必煩總理衙門一檄通商大臣一詰難止須國書一分通事一員往彼妥商自足令其仰體聖人愛民無已之誠心永絕此無窮之毒事固有數十年優容之不問一人轉移之有餘者惟智與勇行之以誠庶乃有濟也

一沿途設局以濟軍食查軍以食爲命往往師行稍遠千里蕭條無食可買無錢可換聞竟有甫領款入手方覺錢多轉瞬採辦維艱又苦錢之易盡者是前進之艱難更無論矣謹擬請旨飭於沿途州縣凡軍行必經之處設立官錢米局則所至無米鹽缺乏之虞無昂貴數倍之苦而兵勇所得之餉銀卽換局中之錢貨展轉灌輸經費較易周轉似亦不無小益以上各條粗灑血忱愚而無當應乞聖慈矜鑒伏念和議終不可成者二我若飲鳩止渴盡

飽其欲則彼不勞而困我勝用數十萬師此不可成一也我若稍拒其鳩而此時一鬆勁彼更密籌緊攻一鬆一緊之間貽誤又多和愈無便於我此終不可成二也今日事勢總在懲前毖後若始終以一和字橫亘於中一請不成而再而三必爲敵人所誤後禍將不可測今日若能上下齊心滅賊他日尙能成好結束此實顯然易見又古之言兵者先求將而後選兵今之言兵者先招兵而並不擇將譬之振衣不提其領結綱不挈其綱是焚之也將自斃矣萬人之將需才必多今將萬人者彼果能得才耶不過乳臭充數請乞相仍缺額中飽宋岳飛曰文官不愛錢武將不惜死天下太平者武將所吝非錢所愛惟死所吝非錢必至剋扣軍餉所愛惟死必難識拔真才訓厲營伍故必文官不愛錢武將自不惜死而後天下太平矣咸同軍興之際人才應運而生星羅棋布赴湯蹈火急難偕來曾國藩尙有人才不敷分布之憂從未有慨擲萬人不問其部下有幾好營官幾好謀士能勝多少之任者如其某將得人稍盛某將營內乏才尙可彼此通融分才相惠如家督於一家之人無不稱量而任件件關心此亦至宜鄭重思維也是否有當足備采擇原憫代奏聖鑒不勝悚惶待命之至

光緒二十年十二月二十一日